

# BISER 33

JU Osnovna škola "Behaudin Selmanović"



Sarajevo, juni 2023.



# Sadržaj

Obraćanje direktora

Vremeplov

Ogledni časovi

Literarni i likovni radovi

Promocija zbornika

Izlet učenika od VI- VIII razreda

Ekskurzija učenika IX razreda

Posjete i projekti nastavnika i učenika

Takmičenje učenika

Tabela takmičenja

Geografske zanimljivosti

## IZDAVAČ

- Urednik: Edina Žugor - Šalaka

- Tehnički urednik: Šeherzada Tahić Zahirović

- Nastavnici saradnici: Nermin Imamović, Elvira Imamović, Elvedin Mehić, Muhamed Pjevo, Semina Vileš-Šipo, Izeta Rahić, Hajrija Velić, Emira Tucaković, Sanela Dučić, Ermina Muslić-Hubijar, Enisa Kanlić, Nevresa Podrug, Elvedina Žunić, Mubera Ibrović, Edita Trnka, Lamija Čelik, Mensur Kopic, Mensur Mujic, Aida Hadžić, Jasmin Marevac, Hodžić Mediha



Dragi čitaoče, pred tobom je novi broj školskog časopisa "Biser" u kojem smo pokušali dati sažet osvrt na događanja u školskoj 2022/2023. godini. Mnogo je aktivnosti iza nas, a ovdje je samo dio onoga što smo radili i realizovali u protekloj godini. Zapisano ostaje, živi, priča i traje. Zato mi zapisujemo i sa lijepim uspomenama krećemo na svako novo putovanje. Od ovog broja smo odlučili da posvetimo pažnju i onima koji čine kolektiv OŠ "Behaudin Selmanović." Krećemo sa novom rubrikom, prebiramo sjećanja kroz vrijeme koje smo ostavili za sobom, a koje je podloga za ono što nam slijedi. U ovom broju "Bisera" predstavljamo one koji su dali poseban pečat školi i kolektivu koji je školom čini.



# Domovino, u srcu te nosim

U ljubavi,  
U čežnji,  
U smiraju,  
U snu,  
Uvijek Bosna.


Sa snagom,  
Sa željom,  
Sa trudom,  
Sa žarom,  
Uvijek Bosna.

Po Kulinu Banu,  
Po Katarini,  
Po Tvrtku,  
Po dervišima,  
Po franjevcima,  
Uvijek Bosna.

Na Drini,  
Na Uni,  
Na Vrbasu,  
Na Neretvi i  
Na Bosni,  
Uvijek Bosna.

Pri svakom koraku,  
Pri svakom otkucaju srca,  
Pri svakom treptaju oka,  
Uvijek i u svemu Bosna.

Esma Selimović VI-1





## **Fehratović Selmir** **Direktor Osnovne škole**

---

Zašto je na prvom mjestu? Zato što zaslužuje, a ne zato što je direktor. Ovaj je čovjek od samog preuzimanja funkcije u školu unio jednu posebnu atmosferu, u kojoj se radi sa zadovoljstvom, sa osmijehom, opuštено i vedro. Ovo je čovjek iz kojeg izvire ideje. Čovjek koji je za kratko vrijeme uspio da u izgled škole unese boje, unese vedrinu koja itekako utiče na motivaciju i rad. Od ideje do realizacije ne čeka se godinama. Svakog dana nešto novo osvane, iznenadi, obraduje učenike i nastavnike. Stoga možemo reći da smo sretan kolektiv koji, sa ovakvom osobom na čelu, može da se uputi bilo gdje, u bilo šta, jer nam uvijek stoji na raspolaganju, u svakoj prilici, situaciji, poslu. Upravo zato otvara ovu rubriku. Ljudskošću, znanjem i dobrotom, sposobnošću, a nikako funkcijom. Bravo, direktore!



# VREMEPLOV

Enesa Mulahmetović - naša Enči.  
Bibliotekarka. Zaštitni znak škole, a u njoj je  
punih 36 godina



Ispunjene su te godine takvim uspomenama koje bi istkale romane. Ispunjene su sjećanjima lijepim, ispunjene i onim što je kvarilo tu ljepotu, ali je naša Enči izdržala sve. Punila te godine što su iza nje svojom dobrotom, plemenitošću. Prenosila znanje generacijama kojima je u najtoplijoj uspomeni ostala. Već 13 godina radi kao bibliotekarka. I konačno u novom prostoru. U pravoj biblioteci. Konačno iz mraka na svjetlo, iz vlage na sunce. Zna Enči i da nas najuri kad joj "prekipi", ali njeno toplo srce ispunjeno je dobrotom kakvu rijetki imaju. Nema broja onima koje je obradovala, pomogla, prijatno iznenadila. Dragaa naša Enči, da si nam živa i zdrava i da ti sreća stalni saputnik bude!



# VREMEPLOV

---




22.09.1997. godine donio prva dva kompjutera u Brijesće, u JU OŠ „Behaudin Selmanović“, poklon Dobrinjske gimnazije

Jasmin Marevac - naš Mrki. Kako u tekst smjestiti sve što je radio i što radi. Bio je učenik ove škole, postao Mašinski inženjer, a onda u nekim godinama koje su svima živote mijenjale, postao nastavnik Tehničke kulture. Bio i borac Armije BiH. Uporedo branio zavičaj, domovinu i prenosio znanje generacijama. U školu donio i prvi računar. Danas to nije interesantno, danas je svima dostupno sve, ali to je bilo vrijeme kad su nam se đaci pitali kako izgleda računar?! Iza njega su brojna takmičenja, priznanja, medalje. Ogromna humanost. Godine su tekle, bogatilo se znanje, iskustvo, plela se prijateljstva. 2018. godine naš Jasko postao direktor škole. Funkcija mnoge obezglavi, ali njega nije. Upravo tu je pokazao da je bio i ostao čovjek. A zar to nije najvažnije? Mandat je istekao, ali ljudskost nije. Kolektiv je sretan što u svom sastavu ovakve ljude ima.

# Ogledni časovi

## Elektronički sklop



27. 4. nastavnica Tehničke kulture Aida Hadžić i nastavnica Informatike Šeherzada Tahić Zahirović sa učenicima VIII-2 odjeljenja održale su ogledni čas na temu "Elektronički sklop". Kroz vježbe asocijacije i križaljke, te praktičan rad izrade i programiranja elektroničkog sklopa, pokazale su povezanost između informatičkih i tehničkih disciplina.



# Sarajevo

19.4.2023.godine, u OŠ „Behaudin Selmanović“, održan je ogledni čas na temu „Sarajevo“. Čas je realizovan timski, a realizatori su : Trnka Edita, Ibrović Mubera i Žunić Elvedina, zajedno sa učenicima odjeljenja V-1, V-2 i V-3. Cilj oglednog časa je bio proširiti stečena znanja o Sarajevu i usvojiti nove historijske činjenice o razvoju grada Sarajeva.



Cilj oglednog časa je bio proširiti stečena znanja o Sarajevu i usvojiti nove historijske činjenice o razvoju grada Sarajeva.

Oglednom času su prisustvovali direktor, pedagogica, kolegice i kolege naše škole kao i gošće iz Instituta za razvoj preduniverzitetskog obrazovanja Kantona Sarajevo– Halilović Ajla i Šaljić Hatidža.

Prošetali smo kroz priču o šeheru, od davnih dana pa do trenutka u kojem jesmo. Pričali o njegovim ljepotama, ali i o ranama koje žive u sjećanju, teške i nezarastle. Miljacka teče i čuva priče o voljenom gradu, šapuće ih obalama


# Dan državnosti BiH

Učenici V-3 su ( četvrtak )  
24.11.2022.godine u sklopu  
predmeta Društvo( Oblast: Moja  
domovina BiH) posvetili čas Danu  
državnosti BiH. Uspješno su putem  
ppt objašnjavali društveno uređenje  
i geografski položaj Bosne i  
Hercegovine.



prikupljali podatke o Mrkonjić Gradu  
(važnost datuma 25.11.1943.),  
prezentirali rezultate istraživanja  
usmeno i pismeno, pisali stihove o  
domovini, pjevali, svirali... Na času su  
prisustvovali direktor škole,  
bibliotekarka, asistentica Jasmina.

Elvedina Žunić







Elif Fehratović I-1



Melek Fehratović I-1



Sarač Lejla IV-1



# Domovina

Samo se jedna zemlja može zvati domovina, a to je zemlja u kojoj smo rođeni, koja nam nesebično pruža dom i u svom zagrljaju nas štiti i čuva. Naša domovina je Bosna i Hercegovina, jedna mala zemlja. Kažem mala, a ustvari je tako velika.. U sebi krije tolike ljepote i bogatstva da joj mnogi zavide i mnogi je žele pod svoje okrilje. Ali da, tako mala, a velika Bosna hrabro stoji i godinama se bori da opstane i bude samo svoja, jedna i jedinstvena. Prkosi ta Bosna dušmanima mnogim, njeni hrabri sinovi su se borili za svaki pedalj, da bude i ostane jedina domovina nama. Kad dođeš u tu Bosnu, o ti stranče, vidjet ćeš visoke planine na kojima čisti zrak koji udahneš u tebi budi novu snagu i daje energiju. Vidjet ćeš rijeke tako čiste, koje svojim žuborom i snagom proizvode najljepše melodije. Ima ta Bosna i spomenike mnoge, obiđi ih, stranče, pogledaj kakvu je historiju imala jedna tako mala, a velika zemlja. Kud god da kreneš, od istoka do zapada, sjevera do juga, nećeš ostati ravnodušan. I ne možeš ostati ravnodušan jer ćeš biti očaran svime što moja Bosna nudi. Ponesi uspomene iz ove divne zemlje i pričaj kud god krenuo o ovoj maloj, a velikoj zemlji, moj stranče....

Merima Šalaka, IX-2

## Jesen, kraljica tame

Kad prije sumrak zagrlji zoru, ali ne onim prijateljskim zagrljajem već onim koji joj poručuje da što prije odjuri iza srebrene kugle.

Tama dobi krunu koju je jesen vezla cijele godine.

Gorčina, magla, hladnoća u srcu prekrivale su zvijezdu Danicu.

Kapi koje frcaju kao vir, ugušile su naš mir.

Lišće, cvijeće ispuštaju svoje posljednje suze, mraz ledeni skratio im je muke.

Vjetar je nosio kočije jeseni. Imala je svoju narandžastožutu haljinu u kojoj je pozdravila našu sreću.

Dok su potočići tekli niz brda, zaostale ptice nisu imale kuda.

Od onog zelenog juna dobili smo košmar pun oluja.

Ćato Nejra, VII-2



# Nanine naočale

Na trenutak mi se učinilo kao da je vrijeme stalo. Svijeća koja je obasjavala usnulu, mrklu noć se ugasila. Moja su se osjećanja smjenjivala poput godišnjih doba. Tuga, strah, ljubav, ljutnja, praznina su razarale moje srce. Odjednom mi se činilo kao je prestalo kucati.

Kad se sjetim očiju njenih umornih, toplih, lica zabrinutog i glasa nježnog koji čujem da me još negdje iz daleka doziva, zapeče duboko u duši. Njenih zamagljenih, velikih naočala, kroz koje sam gledala svaku suzu njenu. Slike iz prošlosti su lebdjele u mojoj glavi, sjećanja na neke lijepe prošle dane. Zagrljaj njen snažni u kojem sam pronalazila mir. Najviše mi nedostaje taj njen blagi glas koji mi je milovao i grijao srce i dušu. Taj topao, zabrinut pogled kao da je iščezao. Uspomene na divne dane provedene skupa pamtit ću zauvijek. Njen život se poput svijeće ugasio, a ja ću svoj morati nastaviti sa velikom prazninom koju je ona ispunjavala dok je bila tu. Možda nju više neću vidjeti, ali ću njene naočale gledati i čuvati i sjećati se njenog lika.

Ema Oglečevac, VII-2

## Moj mačak

Kad bih se prisjećala svih uspomena, potrajalo bi. Zato, pričat ću o biću koje sam voljela i sa kojim sam provela djetinjstvo. To je bio moj mačak koji mi je bio kao najbolji prijatelj, njemu sam mogla pričati cijeli dan i cijelu noć, uvijek bi me saslušao. Nakon nekoliko godina i on nas je napustio, vjetar ga je otpuhao u sjećanja, a sa njim je otišao jedan period mog života. I opet, ne želim da žalim, jer on nije bio bilo kakav mačak, bio je poseban. Kada pomislim na njega, ne postoji ni jedno ružno sjećanje, a to mi je drago. On nije više sa mnom, ali će vječno ostati u najljepšoj uspomeni.

Lamija Zeba, VII-2

# Zapitam se

Zapitam se nekada koje li je mašta boje, da li tu djeca zaista sanjaju snove svoje?

Zapitam se nekada šta je ustvari duga, da li pored sebe imam pravog druga?

Zapitam se nekada zašto kiša pada, a nikada ne ustaje. I da li hrabar čovjek nikada ne odustaje?

Zapitam se nekad i o onom seljaninu koji zadnje žito melje, da li su to ustvari njegove želje?

Zapitam se nekada kako je svaka mama na svijetu bez mane i kako one kriju vješto sve svoje rane?

Zapitam se nekada da li je oblak šećerna vuna i zašto mi je ovih pitanja glava puna?

Zapitam se nekada da li stvarno dobri ljudi idu u raj i da li je zaista i ovoj pjesmi kraj?

Lamija Zeba, VI-2

## Na krilima prijateljstva

Svakog jutra kad se probudim dočekaju me njene krupne, crne oči. U njima kao da vidim najljepši cvijet iz bašte. Kada mi se nasmije, budem jako sretna. Njene nježne ruke, čim me dotaknu, istopim se poput meda. Njen zagrljaj je poput sigurne, mirne luke. Kosa joj je crna i ima najljepši sjaj. Baš kao da je mjesec, a ja njena mala zvijezda. Sa njom mogu pričati baš o svemu. Znam da će čuvati svaku moju tajnu. Znam da će mi dati najbolji savjet za sve. Gdje god krenemo, uvijek nam bude zabavno i lijepo. Ona je moja najbolja prijateljica. Ona je moja mama. Svako dijete, svaka ptica, buba i cvijet imaju svoju mamu ali moja je posebna. Moja je za mene jedina. Uz nju svijet ima najljepše boje. Miriše kao ruža iz bajke. Kad se osmijehne, kao da dobijem krila i poletim. Ta su krila šarene boje. Majka mi je šare naslikala sa divnim osmijehom na licu. Njeno srculence, kao lasta u letu, meni donese sreću. Toplo srce kod nje jako kuca, a naše prijateljstvo je još jače od toga. Krila su mu ogromna i mogu dotaći svaku planetu. Leteći zajedno stići ćemo svuda.

Amila Jakupović III-2



# Majka

**Majka,  
neko ko dušom daje,  
neko ko srcem I snagom traje.  
Neko ko ti ruke ljubi,  
neko ko ti tamu vječnu rubi.  
Neko ko ti snagu daje,  
Anđeo koji duboku jamu krije,  
I kad bude ljubavi,  
I kad budu greške stare,  
Ljubav majčina zna da ustraje.**

**Kakvi god mi bili ljudi,  
Pravda majci ne treba da sudi.  
I kad bi svaka duša ovog svijeta sitna bila- znaj,  
samo se majčina ne bi nikad u tami skrila.**

**Nek joj je život mio, ta sreća mila,  
a vjeruj, samo nebesa znaju,  
koliku bi krv za djecu svoju prolila.  
Za djecu, za sreću svoju ona bi krila dala,  
ne bi li umjesto njih pala,  
a onda kao sjaj prosut s neba opet ustala.  
Kao sjaj s neba, ta noćna vila,  
Njen sjaj zaustaviti neće nijedna sila.  
Sjaj svoj ona samo gubi, kada smrt počinak svoj nudi.**



Hana Perjan, V-2

Rijad Hadžić, IX-1



Asja Ramić, V-2

# Prijateljstvo

Prijateljstvo, to je sreća,  
Prijateljstvo nije prazna vreća,  
Prijateljstvo želi svako,  
A djeca itekako.

Ako prijatelja nemaš ti,  
Pokušaj ga pronaći,  
Pronaći ga nije lahko,  
Jer pravi prijatelj ne može  
Biti svako.

Prijatelj je uvijek tu,  
I u dobru i u zlu.  
Zato čuvaj prijatelja svog,  
On je dio srca tvog.

Ferić Vedad III-3

## Poruka prijatelju

Prijateljstvo je veza, neraskidiva nit između ljudi. Pravi prijatelji se međusobno poštuju, bodre i štite. Prijateljstvo se njeguje i gradi uzajamnim povjerenjem i poštovanjem.

Sretni su oni ljudi koji imaju osobu sa kojom mogu dijeliti svoje trenutke sreće, radosti ali i tuge.

Sretni su jer imaju prijatelje sa kojima mogu letjeti i sanjati zajedničke snove. Prijatelj je naš vjetar u leđa, koji nas pokreće i hrabri kroz teške trenutke.

Ta veza je poput mirisne ruže, ako je njegujemo i zalijevamo, pokloniće nam najljepši cvijet. Taj cvijet će imati najljepše latice koje će vjetar nositi i širiti miris prijateljstva širom svijeta.

Zato poletite i ti na krilima prijateljstva, širite ljubav i sreću, jer pravi prijatelj je uvijek tu, u dobru i u zlu, jer prijateljstvo je moć i najljepši dar od Boga.

Skorupan Asja III-3



# Dvorište kuće moje nane

Nedjelja, jutro. Bijela ograda okupana suncem. Drvena, stara, prava bosanska. Na kapiji nanina ruka. Rumena, velika, snažna, a nježna. Podiže ruku i otvara kapiju, a miris majskih ruža i svježih pečeni uštipaka bore se za mjesto u našim nosićima.

Pažljivo hodamo po tek opranom oblom kamenju koje već dugi niz godina spava na tlu dvorišta. Iz sna ih probudi nana svakog jutra, kantom svježih vode. Prilazimo ukraj dvorišta, šadrvanu. Čokoladne boje, mirisa starog hrasta, selami nas škripom svojih starih dasaka pod našim nogama. Djeluje ponosan na svoj novi krov koji je deda friško okovao. I kao da mu odgovaramo na selam, sjedamo za naninu bogatu sofru. Dok se sladimo vrućim uštipcima, bestiljem i kajmakom u kori, muzičku pratnju nam pružaju mirisne note ruža koje igraju bosansko kolo oko šadrvana. Zelenim opancima i crvenim šamijama, pjevaju sevdalinke. Rano jutarnje majsko sunce se ogleda u snježno bijelom zidu kuće. Mlade voćkice sa bijelim suknjicama, od svježih obojenog kreča, prave piruete na bogatoj i gustoj zelenoj travi. Na pragu kuće, uživajući na suncu, žmirka naš stari mačak. Sada, kada nane više nema, njena ljubav i dalje živi u svakoj boji i mirisu ovog najljepšeg dvorišta na svijetu.

Esma Selimović, VI-1



Amar Herac, V-2



Hana Perjan, V-2



# Posjetili smo Zemaljski muzej

Razmišljajući o sarajevskim zgradama, dolazim do zaključka da je za mene najljepše dvorište Zemaljskog muzeja. Zgradu čine četiri zasebna paviljona koji su međusobno spojeni terasama, a između njih je botanička bašta, oaza mira i ljepote koja me posebno oduševljava.

U bašti se iznad svih biljaka niskog rastinja izdižu dvije džinovske sekvoje čija crvenkasta kora daje osjećaj da smo na nekom egzotičnim mjestu. U centru bašte smjestila se fontana koja izgleda poput malog slapa s visine. U toj fontani plivaju dvije velike kornjače, nezaobilazan detalj pored kojeg se mi djeca najviše zadržavamo. Botanički vrt krasi razne vrste ruža, možemo reći i historijskih jer neke vrste, čiji su cvjetovi obješeni poput bujnih grozdova, potječu još iz srednjeg vijeka. Dvorište je bogato raznim drvećem i biljkama, kako sa naših, tako i sa drugih prostora. A posebno su interesantne egzotične vrste. U centralnom dijelu dvorišta nalaze se i klupe čija je namjena da posjetioци naprave predah dok uživaju u cvrkutu ptica. Cijelu sliku dvorišta ispred muzeja, ali i u unutrašnjem dijelu, upotpunjavaju stećci, nadgrobnni spomenici iz srednjeg vijeka, čuvari naše historije. Bašta je posebno lijepa u proljeće kada drveće krasi behar. Razne boje se počnu prelijevati na proljetnom suncu.

Taj jedinstveni prostor u našem gradu zaista je prava oaza mira u kojoj možete osjetiti šum fontane i cvrkut ptica dok vam se oči odmaraju tonući u zelenilu.

Čarković Bakir, VI 1

Mozaik,  
Đedović Ahmed III-3



Zlatna kantica,  
Jakupović Amila III-2



Torbica,  
Gušić Irhad III-3

Ensar Suljović, V-2



# Moja nana Latifa

U jednom selu na kraju Bosne živjela je starica Latifa. Nekada je u tom selu živjelo mnogo stanovnika, iako je bilo zabačeno i daleko od grada. Živjelo se lijepim životom, a selo je vrvilo od djece. Dođe vrijeme kada se ljudi razidoše, omladina ode u grad za boljim životom, a starci, jedno po jedno umiraše i tako je umirao i život u selu. Latifina kuća bila je na kraju sela, malo izdvojena od ostalih. Već pomalo oronula, ali uredno okrečena u bijelo, odisala je nekom ljepotom. Živjela je nana sama jer joj je dedo već odavno preselio na drugi svijet. Imala je nana troje djece, dva sina i jednu kćerku. Kćerka se već odavno udala i otišla u drugi dom, a sinovi odoše u grad na školovanje. Kada su završili školu, ostadoše da žive u gradu gdje osnovaše svoje porodice. Nana Latifa je ostala da živi sama.

Jednog lijepog proljetnog dana bližio se Bajram, praznik koji je nana slavila. Piše ona djeci pismo i poziva ih da dođu jer će majka pripremiti sofru i napraviti sva jela koja oni vole. „Dođite, djeco, da vas majka vidi dok je još živa i da zajedno proslavimo Bajram.“

Sretna majka, misleći da će joj djeca ispuniti želju, počela je pospremati kuću kad joj djeca dođu da im bude lijepo. Napravi majka baklavu, razne pite i ostala jela koja njena djeca vole. Osvanuo je Bajram, poranila je nana Latifa da pripremi sofru za svoju djecu jer ih je mnogo poželjela. Kada je sve završila, sjela je pored prozora i gledala niz prašnjavi put iščekujući da joj se djeca pojave. Sjedi tako ona u tišini pomalo tužna kao da sluti da neće doći. Sati su prolazili, ali djece nema da dolaze.

Sjedi majka za stolom punim raznovrsnih jela, pa pogleda u prazne stolice gdje su trebala njena djeca da sjede. U tom trenutku niz staro naborano lice potekoše suze kao jesenja kiša niz prozore. Duboku uzdahnu majka i reče: „Možda nisu mogli doći danas pa će drugi put.“ Ne ljuti se majka i moli Boga da ih čuva. I tako nana Latifa ostade i dalje sama u tišini svoje stare kućice da čezne sa svojom djecom i da se nada da će joj jednog dana doći.



Perjan Hana V-2

# Legendarnom komadantu

O, Zaimo, legendo i diko,  
Za tebe zna malo i veliko.

Hrabar si uvijek bio,  
tvoj se narod s tobom ponosio.

Da dođeš do Drine želja ti je bila,  
ali ti dušman kleti slomio krila.  
Vollio si Goražde i Podrinje svoje  
sada ostadoše uspomene tvoje.

Proklet bio dušmanin što ti mladost uze  
sada niz lice tvoje majke teku suze.  
Nije znala jedna što ti sudbina sprema  
pa ne može da vjeruje da te više nema.

O tebi se svuda pjevaju pjesme  
jer se takav borac zaboraviti ne smije.  
Branio si Goražde i zavičaj svoj  
Neka ti je rahmet duši, zlatni ljiljane moj.

Hana Perjan V -2



Mozaik, Hrelja Adin, III-2



Mozaik, Puščul  
Nedžla, III-2



# Na krilima prijateljstva

Na krilima prijateljstva naš razred svakog dana leti.

Velika ptica lastavica, zvana ljubav, široko raširi svoja krila prijateljstva i ponese nas na najljepša mjesta.

Kartu za let imamo svi. I svi letimo. Lete i nestašni Emir iz prve klupe i vješti fudbaler Onur iz druge i istraživač Daim iz četvrte i super-Danin sa duhovitim Amarom iz treće klupe.

Ova vesela družina se čvrsto drži za lijevo krilo prijateljstva, a na desnom krilu su djevojčice, najbolje prijateljice. Jedna je lijepa Hava, dvije vesele Merjem, nasmijane Zara i Ejna. Ruke prijateljstva čvrsto drže slatke Nedžla i Nejla sa tihom Adnom.

Uz osmijeh i igru letimo s našom učiteljicom u mnoge školske avanture i čarobne zemlje.

Mi najviše volimo zemlje ljubavi, znanja, prijateljstva, igre i radosti.

Nakon uzbudljivog leta, vraćamo se svojim kućama, gdje mamama pričamo o prijateljstvu i avanturama koje doživljavamo tokom čarobnog, školskog leta.

Merjem Selimović III-1

## Na krilima prijateljstva

Prijatelji naši posebni su ljudi. Drugačiji od ostalih, a ipak kao i svi drugi. Bez njih ne možemo, a s njima je sve lakše.

Kad podijeliš tajnu s prijateljem, lakše je sačuvati. Kad podijeliš sendvič u školi, slađe ćeš ga pojesti.

Ako imaš simpatiju, onda to prvi prijatelj mora znati. Ni mama, ni tata. Ne upale ni nagovaranja starijeg brata. Jer prijatelj je tu i dovoljno je to za lijep život i djetinjstvo bezbrižno. Ako neko želi prijatelj ti biti, onda dobro mora tvoje tajne kriti. Mora uvijek znati kako tvoju tugu da savlada lahko. Osmijeh podaren drugu nagrada je najveća, isto kao sladoled koji mama obeća.

Velika prijateljstva za velike su ljude, zato budi prijatelj da veliki budeš.

Na krilima prijateljstva lakše je rasti, biti dobar čovjek i prepun časti. Onda možeš sretno kroz život gaziti jer negdje sa strane tvoj prijatelj će te paziti. ...

Nedžla i Nejla Čoko III-1



# Prijateljstvo

Važno je imati prijatelje, ali i isto tako važno je prijatelj biti. Oni nam uljepšavaju svaki novi dan, a i život. Moji prijatelji su druga polovina mene i moje duše. Ako tugu podijelim s drugom, ona polahko nestaje, a sreća koju dijelim s njim postaje veća i ljepša. I tajna je puno ljepša kad se s nekim dijeli.

Prijateljstvo nam daje krila uz pomoć kojih letimo u visine, a prijatelj nam pruže osmijeh i radost. Prijateljstvo nije samo uzimanje i primanje pomoći, nego i ja za prijatelja trebam biti tu i prijatelju uvijek pomoći.

Možemo imati pravog prijatelja ako smo i mi dobri prijatelji. Zato stičimo nove i dobre prijatelje pa poletimo na krilima prijateljstva kroz čarobni, dječiji svijet.

Prijateljstvo se treba ljubomorno čuvati jer je dragocjeno bogatstvo.

Adin Durmišević III-1

## Na krilima prijateljstva

Krila ima bubamara, ptica i šareni leptir, ali niko kao dijete kad na njima leti.

Leti danju puno tajni, uzdaha i misli. I nikad se ne umori pa ih i u snu nosi.

Tu su prve simpatije, petica i misli ko je koga pogledao, kad je šiške podrezao, što sa drugim priča, da li nešto skriva, tebi neko drag što je opet sam?!

I kad zora svane, s krilima ne staneš. Krilima prijateljstva bezbrižno se plovi i drugarstvo se množi. Iz dana u dan nikad nisi sam. Kad zadaća mori, na krilima prijateljstva sve se lahko preboli. Krila prijateljstva sve mogu da liječe.

Znam da ti to znaš, ali opet ću ti reći i na krilima prijateljstva pun tajni pobjeći.

Zara Šalaka III-1



Mozaik, Jakupović Amila,

III-2



Kozija ćuprija,  
Ferić Vedad III-3





Lošić Farah, IV-1

Lošić Farah, IV-1



Sarač Lejla, IV-1

Bajrić Amina, IV-1



# DJEČIJA PLANETA

Izabrani pobjednici/e kreativnih radova povodom  
Međunarodnog dana ljudskih prava 9.12.2022.godine u  
Banjaluci.

„Ove godine pristiglo nam je jako puno radova sa veoma  
snažnim porukama. Komisija je imala veoma težak zadatak, ali  
ono što ohrabruje jeste činjenica da u našim najmlađim ima  
nade za bolju budućnost naše predivne zemlje.“

## DJEČIJA PLANETA

Kada bi djeca upravljala svijetom  
Zemlju bi zvali divnom planetom.

Ne bi se ljudi ljutili na ljude  
Djeca bi otjerala sve mrgude.

Ne bi više bilo problema i rata  
Svi bi bili poput sestre i brata.  
U svijetu bi došlo do pravog mira  
I niko ne bi smio druge da dira.

Na zastavi bi bili cvijet i ptica  
Svi bi vječno bili radosna lica.  
Na kraju vam želim poručiti trajno  
Sa djecom bi planeta izgledala sjajno!

Asja Jahić IV-2, OŠ "Behaudin Selmanović",  
Novi Grad, Sarajevo



Kada bi svijet gledali očima djeteta, on bi zaista bio mnogo ljepše mjesto za  
život!

Pobjednik ovogodišnjeg takmičenja u literarnoj kategoriji je  
Asja Jahić.

Uz ove divne riječi organizatora ostaje mi samo da našoj pobjednici i  
odličnoj učenici IV-2 razreda, Asji Jahić, čestitam i poželim još puno  
uspjeha.



## Promocija zbornika

OŠ "Behaudin Selmanović" organizovala je brojne promocije i literarna druženja.

Međutim, prvi put smo promovisali radove naših učenika. "Na krilima riječi kroz poljane mašte" - naslov je zbirke u koju su uvršteni literarni radovi naših učenika. Ideju za ovaj projekat dao je naš direktor Selmir

Fehratović, a Aktiv nastavnika Bosanskog jezika i književnosti zajedno sa učenicima ideju pretočio u Zbornik radova. Riječi, stihovi, sjećanja - uspomene. Zapisano ostaje, traje i priča. Zato mi zapisujemo i čuvamo sjećanja. Nižemo uspomene na sve ono što će se nekad prohujalim zvati...





## Izvještaj sa jednodnevnog izleta učenika od VI do VIII razreda Planinarski dom ORMANJ – Pazarić

Dana 08.05.2023. učenici od VI do VIII razreda ( 178 učenika ) su u pratnji svojih razrednika realizovali jednodnevni izlet.

Polazak učenika ispred škole je bio u 9 sati, autobusom do željezničke stanice, nakon toga su se vozom dovezli do PAZARIĆA. Od željezničke stanice su u pratnji dva vodiča, u koloni pješke (1,2 km) stigli na brdo Ormanj. Odmah po dolasku učenici su podijeljeni u grupe, po odjeljenjima i u pratnji moderatora krenuli na zabavnu edukaciju i pripremljene sadržaje. Trčanje u vrećama, zip-line, streljaštvo, natezanje konopca, odbojka, vještačka stijena, prelazak sajlom. Učenici su sve predviđene sadržaje veoma dobro savladali i naučili osnove. U predviđenom vremenu su imali i ručak. Povratak je bio u 15 i 15 sati. Po dolasku na željezničku stanicu, smjestili su se u voz i u 16 sati vozom krenuli prema Sarajevu. Nakon izlaska iz voza, odmah su se smjestili u autobuse i bezbjedno vratili do škole u 16 i 50.

I ovaj put su naši učenici pokazali maksimalnu odgovornost kada je u pitanju bezbjednost, kultura ponašanja, uvažavanje, ponašanje na javnom mjestu. Za uspješnu realizaciju ovog izleta, od domaćina smo dobili sve čestitke, kako učenici tako i nastavnici.



Sa učenicima su bili razrednici Mešan Jasna, Ćeman Rašida, Marevac Jasmin, Tahić Šeherzada, Edina Žugor-Šalaka, Semina Vileš-Šipo, Rahić Izeta, Mizdrak Amra, Fazlagić Alma, kao i pripravnica Hodžić Mediha i Kopic Mensur, nastavnik tjelesnog odgoja.



# Izvještaj o realizaciji ekskurzije za učenike 9. razreda



U periodu od 14.5. do 17.5.2023.godine, realizovana je ekskurzija učenika 9. razreda naše škole. Učenici su bili u posjeti Unsko-sanskom kantonu. Na putu prema Bihaću učenici su posjetili Travnik, Jajce, te u poslijepodnevnim satima stigli u Bihać. Drugi dan u pratnji vodiča upoznali smo se sa kulturnim nasljeđem grada Bihaća, a zatim uživali u pogledu na prelijepu i nabujalu rijeku Unu.

Treći dan ekskurzije zbog poplava koje su zadesile Unsko-sanski kanton, nismo mogli realizovati posjetu Nacionalnom parku Una i Štrbačkom buku, kao ni starom gradu Ostrožac jer nam je sigurnost djece bila na prvom mjestu, te smo treći dan realizovali posjetu kinu Cinestar i učenici su uživali u projekciji 3D filma "Čuvari galaksije3"



Četvrti dan je rezervisan za povratak kući, a u povratku smo posjetili Banjaluku, tvrđavu Kastel i džamiju Ferhadiju. U večernjim satima stigli smo u Sarajevo. Cilj ekskurzije je bio da se učenici upoznaju sa kulturnim vrijednostima i prirodnim ljepotama ovog dijela Bosne i Hercegovine. I pored izazova sa kojima smo se susreli zbog vremenskih neprilika, odnosno poplava koje su zadesile Unsko-sanski kanton, ekskurzija je uspješno realizovana. U pratnji učenika bili su razrednici Hajrija Velić, Mirsad Muharemović i direktor škole Selmir Fehratović.



# Ekološka sekcija u posjeti Zoološkom vrtu "Bambi"

U utorak, 15.11.2022.godine članovi Ekološke sekcije sa nastavnicom biologije Hajrijom Velić posjetili su Zoološki vrt "Bambi" u Hrasnici.

Učenici su u toku posjete prisustvovali edukativnom času o životinjama, jahali konja, a pored edukativnog bilo je i radno. Naime, domaćini su pripremili 5 sadnica šljive i naši ekolozi su sa radošću obavili sadnju.

## Svjetski dan čišćenja

I ove godine smo se pridružili projektu tima Lets do it i učestvovali u Svjetskom danu čišćenja.

U sedmici od 12.9 do 16. 9. 2022. godine organizovali smo dvije akcije čišćenja školskog dvorišta i prilaznih puteva prema školi. Mlađi učenici ( VI razred ) su čistili dvorište i jedan od prilaznih puteva prema školi 15.9.2022. godine i tom prilikom sakupili 11 kg otpada (papir i plastične flaše). Stariji učenici ( IX razred), čistili su ostale pristupne puteve prema školi i sakupili 10 kg otpada ( papir i plastične flaše).

Hajrija Velić, nastavnica biologije, vođitelj Ekološke sekcije  
JU OS „Behaudin Selmanović“  
Sarajevo







## Svjetski dan jabuke



I ove školske godine Ekološka sekcija nastavlja sa obilježavanjem datuma iz Eko-kalendara. Učenici su na časovima sekcije u oktobru vrijedno radili kako bi pripremili završnu manifestaciju obilježavanja Dana jabuke. Radili su plakate i panoe na temu Jabuka, power point prezentaciju, pozivnice za sve zaposlenike škole, a ono najsladje, proizvode od jabuka, radili su u svom domu zajedno sa roditeljima. Završna manifestacija je bila u petak, 21.10.2022. godine (pomjerena iz opravdanih razloga). Na času su nam se pridružili zaposlenici i direktor škole, te su zajedno sa učenicima uživali u svježim jabukama i domaćim proizvodima od jabuka ( sokovi, kolači, pekmez...). Na ovom projektu se još jednom pokazala izvanredna saradnja roditelja sa školom, kao i značaj partnerskog odnosa roditelj-škola.

Nastavnica biologije i voditelj Ekološke sekcije,  
Hajrija Velić



# NIJEDNO DIJETE BEZ PAKETIĆA

Odjeljenja II-1 i II-2 su u saradnji sa roditeljima i svojim učiteljicama Imamović Elvirom i Čelik Lamijom, učestvovali u humanitarnoj akciji „Ni jedno dijete bez paketića“ i tako po ko zna koji put pokazali svoju humanost.

Spakovano je i predano preko 60 paketića.

Neka svako dijete bude sretno i nasmijano!



## PROSLAVA DANA DJEČIJE RADOSTI

U petak, 30.12.2022. godine, učenici II1 i II2 odjeljenja zajedno sa svojim učiteljicama Elvirom Imamović i Lamijom Čelik obilježili su Dan dječije radosti organizirajući priredbu za roditelje. Svojim roditeljima pokazali su koliko su bili vrijedni i marljivi tokom prvog polugodišta. Priredbe su uveličali domaći dragi gosti: direktor Selmir Fehratović, pedagogica Elvira Šehović, bibliotekarka Enesa Mulahmetović, socijalna radnica Amela Muftić-Arapović.

I roditelji su bili vrijedni, organizirali su se i pripremili, te nagradili djecu poklon paketima.

Druženje, puno recitacija, glume i pjesme će zasigurno ostati u lijepom sjećanju svim prisutnim i osnažiti vezu između škole i porodice.





## **Naša škola osvojila III mjesto na konkursu Mladi i naslijeđe**

Ovogodišnja tema konkursa glasila je:  
„ODRŽIVA KULTURNA I PRIRODNA BAŠTINA-TRADICIJA, BUDUĆNOST I MLADI“

Naša škola osvojila je III nagradu za kolekciju radova na federalnom nivou.

Učesnici u projektu i članovi tima bili su: učenici VII-1 ( Glušević Amina, Sajra Fazlić, Lamija Sarač i Merjem Trnka), učenici VII-2 ( Džana Kišić, Ema Oglečevac, Lamija Zeba i Lajla Zuban) i učenici II-1 (Elhana Mašić, Amina Fehrić, Arman Pezerović, Elmin Mršo)

Mentori učenicima bili su :nastavnik historije Nermin Imamović, nastavnica geografije Semina Vileš-Šipo i učiteljica Elvira Imamović.

Izložba radova i svečana dodjela Diploma učenicima i Priznanja nastavnicima, održana je u četvrtak 10.11. 2022. godine u Sarajevu, Galerija Roman Petrović“ u 15:00 sati.

# PROJEKAT RECIKLIRAJ- DONIRAJ

Projekat Recikliraj-doniraj podrazumijevao je sakupljanje plastičnih flaša određeni vremenski period, a nakon toga odlaganje istih u Reciklomat, te doniranje prikupljenih sredstava.

Ciljevi projekta su ekološkog i humanitarnog karaktera.

Prikupljanjem i adekvatnim odlaganjem plastičnih flaša iste će se reciklirati, te ćemo tako sačuvati okolinu od zagađenja, a sredstva koja smo dobili odlaganjem plastičnih flaša donirali smo humanitarnoj organizaciji „Pomozi.ba“.

Nositelji realizacije projekta:  
Aida Hadžić, nastavnica kulture življenja i tehničkog odgoja i

Šeherzada Tahić Zahirović,  
nastavnica informatike



## PROJEKAT MOJA KOSA- TVOJA KOSA



Projekat Moja kosa-tvoja kosa podrazumijevao je šišanje nefarbane, netretirane kose, dužine 30 cm, te doniranje iste Udruženju Srce za djecu oboljelu od raka. Od donirane kose se izrađuje prirodna kosa i daje na korištenje (potpuno besplatno) djeci koja su privremeno ili trajno pretrpjela gubitak kose. Naših devet učenica: Medina Majstorić, Erna Sirbubalo, Alina Rizvo, Ismihana Tatlić, Lemmana Čavčić, Lamija Redžić, Adna Kulovac, Saira Hajdarević, Nejla Omeragić i nastavnica Aida Hadžić donirale su kosu i na taj način pomogle da se barem na tren vrate osmijesi i uljepšaju dječija lica. 32



# Izložba radova petih razreda

Izložba radova petih razreda podrazumijevala je izradu bosanskog ćilima i ukrasnih predmeta na časovima Kulture življenja, prikupljanje tih radova od strane predmetne nastavnice i adekvatnu izložbu u holu škole. Dodatak izložbi su bili plakati na temu bosanka kuća, tradicionalna jela i narodna nošnja, koje su uradili pojedini učenici iz svakog odjeljenja petog razreda. Izložba je upriličena u periodu od 21.-25.11.2022. godine, a povodom obilježavanja Dana državnosti BiH. Postavljanje izložbe su realizovale učiteljice Mubera Ibrović, Elvedina Žunić i predmetna nastavnica Aida Hadžić.

Nositelj realizacije izložbe: Aida Hadžić, nastavnica Kulture življenja i tehničkog odgoja





# Posjeta kinu

29. 12. 2022. godine svi učenici od I do V razreda (13 odjeljenja) u pratnji svojih učiteljica, bibliotekarke Enese Mulahmetović i socijalne radnice Amele Muftić-Arapović posjetili kino CineStar. Učenici su gledali „Put oko svijeta za 80 dana“. Posjeta je bila kulturno-edukativnog karaktera. Učenici su uživali u projekciji i svojim lijepim ponašanjem dostojno predstavili našu školu.



## POSJETA KINU NOVI GRAD

U četvrtak, 16.2.2023.godine učenici IX-1 i IX-2 odjeljenja su u pratnji razrednika Hajrije Velić i Mirsada Muharemovića posjetili kino Novi Grad i prisustvovali projekciji filma "Amanet". Posjeta je realizovana u saradnji sa Općinom Novi Grad.





# Projekat „Reciklaža nije gnjavaža“

U periodu od 13.-17. 3. 2023. godine u saradnji sa Zavodom za javno zdravstvo Kantona Sarajevo u našoj školi je realizovan projekat pod nazivom „Reciklaža nije gnjavaža“ . U projektu su učestvovali učenici II razreda sa svojim učiteljicama Čelik Lamijom i Imamović Elvirom. Projekat je imao za cilj da kroz radionice i aktivnosti različitog tipa razvije svijest o očuvanju okoliša, razvrstavanju smeća i reciklaži otpada. Pored naučenog znanja i vještina, rezultat projekta je divna izložba učeničkih radova u donjem predulazu škole.



## Projekat "Zdrava školska užina"

U petak, 28.4.2023. godine, članovi ekološke sekcije, pod vodstvom nastavnice Hajrije Velić realizovali su projekat "Zdrava školska užina". Radom na projektu učenici su učili o osnovnim sastojcima hrane, piramidi ishrane i istraživali recepte za zdrave školske užine. Sve što su naučili, učenici su i praktično primijenili danas na času. Od zdravih sastojaka napravili su zdrave školske obroke.



# TERENSKA NASTAVA- POSJETA CENTRU SAFET ZAJKO- SARAJEVO



U sklopu tjelesnog i zdravstvenog odgoja planirana je terenska nastava u toku školske 2022/2023.godine.

Učenci trećeg razreda u pratnji svojih učiteljica Hubijar-Muslić Ermine, Podrug Nevrese i Kanlić Enise kao i socijalne radnice Amele Muftić- Arapović i bibliotekarke Mulahmetović Enese, posjetili su Centar Safet Zajko i proveli niz aktivnosti.

Posjeta je organizovana u petak, 21.10.2022.godine.

Izlet je bio sadržajan u smislu raznovrsnih igara i korelaciju sa svim nastavnim predmetima.

Uživali smo na sportskim terenima, okruženi bojama jeseni.

Kako su protekle aktivnosti najbolje će opisati fotografije u galeriji.

## Učenci trećeg razreda obilaze znamenitosti Sarajeva

U utorak, 8.11.2022.godine učenci trećeg razreda u pratnji svojih učiteljica i predstavnika Udruženja „Mali ambasadori Sarajeva“, uživali su u edukativnom obilasku Sarajeva, te se na inovativan i kreativan način bolje upoznali sa kulturnim i historijskim naslijeđem domovine i glavnog grada. Prilikom obilaska šehera, djeca su usvojila nova saznanja, između ostalih i o Vijećnici i Inat kući, Carevoj džamiji, Latinskoj ćupriji, Bravadžiluku i Kazandžiluku, Sebilju, Gazi Husrev- begovom vakufu, Jevrejskoj četvrti, Katedrali Srca Isusova, Sabornoj crkvi.

Prošetali smo ulicama starih zanata i uživali u ćevapima.

Svi učesnici će dobiti certifikat „Mali ambasador Sarajeva“.







## Radionica: Pružanje prve pomoći

U srijedu, 28.12.2022.godine u sportskoj dvorani u sklopu Terenske nastave održana je radionica za učenike trećeg razreda na temu Pružanje prve pomoći.

Realizovana je uz pomoć roditelja:  
dr.Enisa Selimović-Mešanović i  
med.techn.Esada Čoko.

Prisustvovalo je 60 učenika trećeg razreda i njihove učiteljice: Podrug Nevresa, Hubijar-Muslić Ermina i Kanlić Enisa.

Radionica je veoma uspješno realizovana uz veliko interesovanje i zadovoljstvo djece.

## Posjeta Zemaljskom muzeju

U petak, 14.4.2023. u okviru terenske nastave učenici trećeg razreda su posjetili Zemaljski muzej u Sarajevu. Posjeta je bila edukativnog karaktera pri čemu su učenici pokazali veliko interesovanje za ovaj oblik nastave i upotpunili svoja znanja novim o biljkama, životinjama, prirodnim bogatstvima, historiji, tradiciji i kulturi naše lijepe Bosne i Hercegovine.



## Učili smo o osnovama pružanja prve pomoći – drugi dio radionice za učenike III razreda

U utorak, 23.5.2023. godine u okviru terenske nastave realizovan je drugi dio edukacije iz pružanja prve pomoći za učenike trećeg razreda. Program edukacije djece nikada nije prerano započeti jer su u najranijoj dobi djeca spremna primiti prva znanja o pružanju prve pomoći kroz igru, a u njihovu svijest je u toj dobi nužno ugraditi potrebu brige za sebe i druge u slučaju nezgoda.

Upravo takvu, djeci primjerenu radionicu, kroz igru sa njihovim omiljenim igračkama, u kojoj su djeca aktivnim učešćem praktično vježbala pružanje prve pomoći, realizovali su roditelji naših učenika dr.Enisa Selimović-Mešanović i med.techn. Esada Čoko u saradnji sa učiteljicama Hubijar-Muslić Erminom, Podrug Nevresom i Kanlić Enisom.





# Edukacije – Filozofija za djecu



U Osnovnoj školi "Behaudin Selmanović", u periodu 23-25. 01; 15-16. 03. 2023.godine, realizovana je edukacija za nastavnike razredne nastave koji nastavu realizuju u trećem, četvrtom i petom razredu.

Tema edukacije: P4C – Filozofija za djecu

Cilj edukacije je upoznavanje metode učenja i podučavanja za unapređenje kritičkog mišljenja.

Edukacija je realizovana uz podršku TPO Fondacije i Ministarstvo za odgoji obrazovanje Kantona Sarajevo. Prisustvovala su učiteljice iz OŠ "Mustafa Busuladžić", OŠ "Umihana Čuvidina", OŠ "Behaudin Selmanović", a replikacioni trening su vodile Dučić Sanela i Tucaković Emira. Uz izuzetno kvalitetnu tehničku pripremu koju je podržao direktor škole, Fehratović Selmir, pozitivnu radnu atmosferu, cilj edukacije je ostvaren, a učesnici osposobljeni da primjene ovu metodu rada u svojim učionicama i da mrežu iskustava šire kolegicama i kolegama u svojim školama.





## SAJAM IT GIRLS KLUBOVA U SARAJEVU

PRAVA PRILIKA ZA BAVLJENJE PROGRAMIRANJEM: Amila, Emana i Asja iz Osnovne škole "Behaudin Selmanović" u Briješću na Sajmu IT Girls klubova u Sarajevu predstavile su semafor i senzor pokreta koje su programirale u Arduinou:

“Volim programiranje i o tome sam razmišljala i prije ove sekcije, a na sekciji sam dobila i pravu priliku da se tim ozbiljnije i bavim”, kaže Amila.

Sajam IT Girls klubova održan je u okviru cjelodnevnog događaja pod nazivom “Ko pokreće BiH? IT djevojke!” obilježilo je Međunarodni dan djevojaka u sektoru informacija, komunikacija i tehnologije (IKT) . Cilj događaja bio je naglasiti važnost osnaživanja djevojčica i djevojaka kroz različite projekte u okviru inicijative IT Girls, na kojima rade četiri UN agencije u Bosni i Hercegovini: UNDP, UNICEF, UN Women i UNFPA, kao i neophodnost učešća IKT sektora, kako u procesu sticanja vještina i obrazovanja, tako i u stvaranju privlačnog radnog okruženja za djevojke.





# KANTONALNO TAKMIČENJE IZ HISTORIJE

Na kantonalnom takmičenju iz historije koje je održano u ponedjeljak 15. maja, u OŠ "Alija Nametak", učenici naše škole sa projektom "Visoki visoki sjaj" osvojili su treće mjesto. Ekipu koja je realizovala projekat činili su sljedeći učenici: Trnka Merjem, Fazlić Sajra, Maksumić Adna, Pribišić Sanin (učenici VII1), te Oglečevac Ema i Šabanović Ilhana (učenice VII2). Veliku pomoć u realizaciji projekta pružile su učenice Kujraković Kanita i Gluščević Amina (VII1). Bravo Ekipa!

Nastavnik: Nermin Imamović

## OPŠTINSKO TAKMIČENJE IZ HISTORIJE

Na opštinskom takmičenju iz historije koje je održano u četvrtak 27. aprila, u Centru za edukaciju "Safet Zajko", učenici naše škole sa projektom "Visoki visoki sjaj" osvojili su prvo mjesto i plasirali se na kantonalno takmičenje. Ekipu koja je realizovala projekat činili su sljedeći učenici: Trnka Merjem, Fazlić Sajra, Maksumić Adna, Pribišić Sanin (svi učenici VII1), te Oglečevac Ema i Šabanović Ilhana (učenice VII2). Veliku pomoć u realizaciji projekta pružile su učenice Kujraković Kanita i Gluščević Amina (VII1).

Nastavnik: Nermin Imamović



# KANTONALNO TAKMIČENJE IZ ENGLESKOG I BOSANSKOG JEZIKA

## **Engleski jezik**

Edina Muharemović, učenica IX-1 odjeljenja , predstavljala je našu školu na ovogodišnjem Kantonalnom takmičenju iz engleskog jezika. Nakon osvojenog prvog mjesta na školskom takmičenju iz engleskog jezika , Edina je bila 12. na kantonalnom nivou sa osvojenih 88 bodova od mogućih 100. Učenica je vrijedno radila tokom čitave školske godine i dostojno predstavila našu školu na takmičenju.

## **Bosanski jezik**

4.5.2023.godine u Prvoj osnovnoj školi na Ilidži održano je Kantonalno takmičenje iz Bosanskog jezika i književnosti. Učenik VII-1 odjeljenja Gušić Salih zauzeo je 8.mjesto





## **AKTIVNOSTI HISTORIJSKE SEKCIJE ZEMALJSKI MUZEJ**

Učenici naše škole, članovi Historijske sekcije, u četvrtak 27.10.2022. godine, posjetili su Zemaljski muzej i uvjerali se u bogatstvo građe u prirodoslovnom i arheološkom paviljonu. Želimo pohvaliti učenike koji su dostojanstveno i ponosno predstavljali našu školu i po riječima kustosa „činili rijetko pažljivu i zainteresovanu skupinu“.

## **SOKOLJE**

U subotu, 18.3.2023. godine, učenici naše škole, članovi Historijske sekcije, učestvovali su u obilježavanju bitaka za odbranu Sokolja.

## **Svečana akademija**

U subotu, 1.10.2022. godine, učenici naše škole, članovi Historijske sekcije, učestvovali su na svečanoj akademiji povodom 30 godina od formiranja II viteške brigade.

## **Počast heroju i Zlatnom ljiljanu Smaji Šikalu**

U četvrtak, 8.12.2022. godine, učenici naše škole, članovi Historijske sekcije, učestvovali su u obilježavanju 30-te godišnjice oslobođenja kote Vis na brdu Žuč i odavanju počasti heroju i Zlatnom ljiljanu Smaji Šikalu. Sve pohvale za dostojanstveno ponašanje naših učenika.

## **Dujmovska brda**

U subotu, 29.10.2022. godine, učenici naše škole, članovi Historijske sekcije su učestvovali u obilježavanju bitke na Dujmovskim brdima (Bitka za tenkove).

Voditelj historijske sekcije: Nermin Imamović



## **PROJEKAT VOLIM BOSNU I HERCEGOVINU**

U našoj školi od mjeseca oktobra 2022. godine realizuje se projekat Volim Bosnu i Hercegovinu. Učešće u projektu je uzeo veliki broj učenika VII, VIII i IX razreda. Projekat je završen u četvrtak 23.2.2023. godine kviz takmičenjem. U finalu su se takmičile 4 najbolje ekipe:

- Ekipe Zmajevi (Zeba Lamija, Gušić Hana, Barimac Edin) VII2
- Ekipe Zlatni ljiljani (Čubro Amina, Đozo Ilma, Begić Zajko) VIII2
- Ekipe Spahije (Durmišević Adna, Omeragić Lamija, Pašić Bakir) IX2
- Ekipe Bosanski banovi (Oglečevac Ema, Bećirović Tarik, Karavdić Harun) VII2

Čestitke pobjednicima, ekipi Spahija IX2. Naši učenici su pokazali kako se znanjem voli Bosna i Hercegovina.

Veliko hvala svim učenicima i kolegama na pomoći u realizaciji projekta, a posebno članovima Historijske sekcije, Geografske sekcije i sekcija Šareni svijet II1 i II2. Tim projekta: Semina Vileš-Šipo, Elvira Imamović, Nermin Imamović.







## **PLANINARSKE IGRE MLADIH**

Učenici naše škole, članovi Planinarske družine "Behaudin Selmanović", u subotu 15.10.2022. godine, uzeli su aktivno učešće u prvim planinarskim igrama za mlade u organizaciji Planinarskog sportskog društva Zlatni ljiljan i Opštine Novi Grad. Želimo pohvaliti učenike koji su dostojanstveno i ponosno predstavljali našu školu i ostvarili zapažene rezultate

Ekipu u streljaštvu činili su: Fazlić Sajra (kapiten) VII1, Curić Ammar VII2 i Srna Amsal VIII2

Kretanje uz uže: Pašić Mela (kapiten)VIII1, Kajtaz Sarah VIII1 i Sarač Lamija VII1

Štafeta: Terović Sajra (kapiten) IX1, Mutapčić Zerina VIII2 i Kulovac Adna VIII3

Odbojka na travi 4. mjesto: Čaušević Nađa (kapiten) VIII3, Mušanović Dalila VII1, Fejzić Amna VIII2, Trnka Merjem VII1, Gušić Hana VII2 i Oglečevac Ema VII2

Orijentacija 2. mjesto: Đozo Ilma (kapiten) VIII2, Omeragić Nejla VIII3 i Hajdarević Saira VIII3

Potezanje konopa 1.mjesto: Korać Haris (kapiten) IX2, Fazlagić Elmin VIII1, Fazlagić Elmir VIII1, Čubro Amina VIII2, Aganović Faruk VIII2, Hurko Bilal VIII2, Zuban Lajla VII2 i Zeba Lamija VII2



## **IZLET SARAJEVO-TRAVNIK-JAJCE-SARAJEVO, ZAVRŠNA AKTIVNOST PROJEKTA VOLIM BOSNU I HERCEGOVINU**

Kao što Vam je od ranije poznato u našoj školi od oktobra mjeseca se realizuje projekat Volim Bosnu i Hercegovnu. Takmičarski dio projekta u kojem su učenici pokazali zavidno znanje o našoj zemlji završen je finalnim kvizom 23. februara 2023. godine.

Završni dio projekta je realizovan u petak, 5.5.2023. godine. Učenici naša škole, 46 učenika, učesnici kviz takmičenja, članovi sekcije Šareni svijet II1, Geografske i Historijske sekcije su realizovali izlet na relaciji Sarajevo-Travnik-Jajce-Sarajevo. Tokom izleta naši učenici u pratnji učiteljice Elvire Imamović, nastavnice geografije Semine Vileš-Šipo i nastavnika historije Nermina Imamović posjetili su čuvenu travničku Plavu vodu, travničku tvrđavu, srednjovjekovnu bosansku tvrđavu u Jajcu i prelijepi vodopad Plive u Jajcu.

Pokrovitelj ovog putovanja bila je patriotski orijentisana kompanija BH Pošta, koja je mlade patriote naše škole nagradila ovim putovanjem.

Tim projekta:  
Semina Vileš-Šipo  
Elvira Imamović  
Nermin Imamović



Ubijali su ljude, ali nisu istinu, ubijali su djecu, ali se nova rađaju. Ubijali su gradove.  
No, preživjeli su da se sjećaju i svjedoče.



...izložili ga snajperskoj i artiljerijskoj paljbi tokom koje je stradalo 11 500 civila od čega 1 601 dijete...1 601 dijete nije imalo pravo na radosti djetinstva, radosti i tuge prvih ljubavi...pravo na život.



## Sjećanje na ubijenu djecu Sarajeva

U našoj školi su održani historijski časovi, u odjeljenjima VII1, VII2 i VII3, s ciljem sjećanja na ubijenu djecu Sarajeva. Časove je realizovao nastavnik historije Nermin Imamović uz pomoć učenika. „Ubijali su ljude, ali nisu istinu. Ubijali su djecu, ali se nova rađaju. Preživjeli su tu da se sjećaju i svjedoče“.

### Zavičajni muzej

Učenici naše škole, članovi Historijske sekcije, u sklopu priprema za realizaciju projekta Visoki visoki sjaj su posjetili Zavičajni muzej u Visokom. Voditelj Nermin Imamović





## Krunisanje

Učenici naše škole, članovi Historijske sekcije, u sklopu priprema za realizaciju projekta Visoki visoki sjaj su posjetili krunidbeno mjesto bosanskih kraljeva, Mili kod Visokog.

Voditelj: Nermin Imamović





# IZVJEŠTAJ SA MANIFESTACIJE „ DANI MATICE HRVATSKE „

U Ponedjeljak 19.12.2022. godine upriličena je revijalna izložba likovnih radova u galeriji „Mak,, pod pokroviteljstvom Matice Hrvatske u Sarajevu .

Izloženi su likovni radovi učenika osnovnih i srednjih škola kantona Sarajevo koji ima za cilj razmjenu kulturno-historijskih dobara .

Naša škola se odazvala ranije ovom konkursu, gdje je trebalo poslati likovne radove koji su najbolji u selekciji . Poslali smo tri

likovna rada učenika :

Merjem Trnka VII-1

Ajša Omerović VI-2

Bakir Ferić VII-1

Naši učenici su se predstavili sa predivnim likovnim radovima i osim izložbe uvršteni su u katalog Matice Hrvatske odabranih likovnih radova . Na taj način učenici su doprinijeli promociji naše škole kroz aktuelna kulturna dešavanja u kantonu Sarajevo

Nastavnik likovne kulture : Muhamed Pjevo

# KANTONALNO TAKMIČENJE U ATLETICI

Dana 07.10.2022 godine održano je takmičenje u organizaciji Kantonalnog atletskog saveza "Atletski kup za osnovne škole Kantona Sarajevo" koji se održao u sportsko-rekreativnom centru "Safet Zajko". Učenici OŠ "Behaudin Selmanović" su uzeli učešće u ovom takmičenju u disciplinama 4x100m za djevojčice, 4x100 m za dječake i 60 m za djevojčice gdje je učenica Emina Šuvalija zauzela III mjesto. U disciplinama 4x 100 m za djevojčice nastupale su: Šuvalija Emina, Šabanović Najra, Pediša Šejma i Karčić Alma. U disciplinama 4x 100 m za dječake nastupale su: Pašić Bakir, Zuko Adi, Jusubašić Adin i Zeba Amer. Iako nisu uspjeli osvojiti jedno od prva tri mjesta u disciplinama 4x100 m za djevojčice i dječake učenike koji su nastupali treba pohvaliti na trudu i zalaganju.

Nastavnik: Ković Mensur





# TAKMIČENJA I POSTIGNUĆA UČENIKA U ŠKOLSKOJ 2022/2023. GODINI

<b>PLASMAN</b>	<b>PREZIME I IME UČENIKA/NASTAVNIKA</b>	<b>PREZIME I IME NASTAVNIKA</b>	<b>NAZIV TAKMIČENJA</b>
1.mjesto	Trnka Merjem, Fazlić Sajra, Maksumić Adna, Pribišić Sanin, Oglečevac Ema, Šabanović Ilhana, Kujraković Kanita, Gluščević Amina	Imamović Nermin	Historija
1.mjesto	Kujraković Ali	Kopić Mensur	Atletski kup – trčanje na 60 metara
1.mjesto	Bečirević Tarik	Kopić Mensur	Postani atleta – skok u dalj
1.mjesto	Gušić Hana	Kopić Mensur	Postani atleta – skok u dalj
1.mjesto	Kujraković Kanita	Kopić Mensur	Postani atleta – trčanje na 60 metara
2.mjesto	Nogo Kenan	Kopić Mensur	Postani atleta - vortex
2.mjesto	Muminović Maida	Kopić Mensur	Postani atleta - vortex
2.mjesto	Šabanović Ilhana	Kopić Mensur	Postani atleta – skok u dalj
2.mjesto	Džananović Emina	Kopić Mensur	Postani atleta – trčanje na 200 metara
2.mjesto	Kujraković Ali, Zuko Adi, Jusubašić Adin	Kopić Mensur	Atletski kup – štafeta 4x100 metara
	i Zeba Amar		
2.mjesto	Atletaska sekcija	Kopić Mensur	Ekipni plasman – POSTANI ATLETA
3.mjesto	Šuvalija Emina	Kopić Mensur	Atletski kup – trčanje na 60 metara
3.mjesto	Pašić Bakir	Kopić Mensur	Atletski kup – skok u dalj
3.mjesto	Šuvalija Emina, Šabanović Najra, Pašić Mela i Muharemović Edina	Kopić Mensur	Atletski kup – štafeta 4x100 metara
3.mjesto	Velić Arman	Kopić Mensur	Postani atleta – trčanje na 60 metara
3.mjesto	Hodžić Ilhan	Kopić Mensur	Postani atleta - vortex
3.mjesto	Curić Ammar	Kopić Mensur	Postani atleta – skok u dalj
3.mjesto	Fazlić Sajra	Kopić Mensur	Postani atleta – trčanje na 60 metara

# TAKMIČENJA I POSTIGNUĆA UČENIKA U ŠKOLSKOJ 2022/2023. GODINI

## KANTONALNO TAKMIČENJE

<i>PLASMAN</i>	<i>PREZIME I IME UČENIKA/NASTAVNIKA</i>	<i>PREZIME I IME NASTAVNIKA</i>	<i>NAZIV TAKMIČENJA</i>
3.mjesto	Trnka Merjem, Fazlić Sajra, Maksumić Adna, Pribišić Sanin, Oglečevac Ema, Šabanović Ilhana, Kujraković Kanita, Gluščević Amina	Imamović Nermin	Historija

## FEDERALNO TAKMIČENJE

<i>PLASMAN</i>	<i>PREZIME I IME UČENIKA/NASTAVNIKA</i>	<i>PREZIME I IME NASTAVNIKA</i>	<i>NAZIV TAKMIČENJA</i>
1.mjesto	Jahić Asja	<u>Tucaković Emira</u>	Međunarodni dan ljudskih prava – literarni rad
3.mjesto	Murtić Imran	Pjevo Muhamed	Takmičenje iz oblasti saobraćajne edukacije (likovni rad) na nivou Federacije BiH
3.mjesto	Historijska sekcija, Geografska sekcija i sekcija šareni svijet II-1	Vileš-Šipo Semina, Imamović Elvira, Imamović Nermin	Dani evropskog nasljeđa 2022. – Mladi i nasljeđe



# GEOGRAFSKE ZANIMLJIVOSTI



## PLUTAJUĆI TEREN ZA FUDBAL

Ribarsko naselje sa plutajućim terenom za fudbal u Phang Nga (Fanganga), Tajland.

Njihovo plutajuće fudbalsko igralište nastalo je iz inspiracije nakon Svjetskog prvenstva 1986. godine, gdje je grupa navijača fudbalera odlučila da izgradi teren na vodi jer jedva da su imali zemlju na kojoj bi mogli da igraju. Ubrzo je grupa prerasla u Paniee FC, koji je osvojio nekoliko regionalnih šampionata u zemlji

## PLAVI VULKAN

- Vulkan Kavah Ijen je najspecifičniji vulkan na svijetu, jer izbacuje plavu lavu. Nalazi se u istočnom delu ostrva Java u Indoneziji. Danju se u vulkanu iskopava sumpor. Noću obasjava nebo izrazito plavom svjetlošću. Nedaleko od njega nalazi se tirkizno sumporno jezero.
- Gasovi i tečni sumpor koji izlazi iz pukotina u vulkanu pod visokim pritiskom i temperaturom, koja dostiže 600 stepeni, prelijeva se preko ivica jezera i gori plavim plamenom, koji dostiže i do 5 metara visine.

